



FYLKESMANNEN I SOGN OG FJORDANE

Sakshandsamar: Tore Larsen
Telefon: 57643126
E-post: fmsftla@fylkesmannen.no

Vår dato
13.05.2015
Dykkar dato
14.03.2015

Vår referanse
2015/1127 - 433.2
Dykkar referanse

Ivar Raa
Ljøsne
6887 LÆRDAL

Svar på søknad om utsetjing av utanlandske treslag - Ivar Raa

Vi viser til søknad frå deg datert 14.3.2014 om utplanting av utanlandske treslag for produksjon av juletre og pyntegrønt.

Bakgrunn

Forskrift om utsetting av utanlandske treslag trådde i kraft 1. juli 2012, og skal hindre at utplanting av utanlandske treslag får uheldige følgjer for naturmangfaldet. Forskrifta har heimel i naturmangfaldlova, og det går fram av §30 i lova at utsetting av utanlandske treslag krev løyve, og at slikt løyve ikkje kan bli gitt dersom det er grunn til å tru at utsettinga kan føre til vesentlege uheldige verknader på det biologiske mangfaldet.

Søknaden gjeld utplanting av fjelledelgran (*Abies lasiocarpa*), proveniens Duffy Lake. Plantinga vil skje i ein teig på om lag 2 dekar, og omfattar planting av 1 000 tre.

Plantinga er planlagt på gnr/bnr 7/2 i Lærdal kommune, på ei flate i dalbotnen ved elva Nivla i Råsdalen. Det blei i 2007 planta ut 7 dekar juletre på tidlegare grasmark 40 meter nord for den omsøkte teigen, og i 2012 blei det planta ut juletre på 5-6 dekar tidlegare morellhage like sør for teigen. Samla areal til juletreproduksjon i området blir dermed om lag 15 dekar. Det blir i tillegg vurdert å plante ut juletre i ein teig på om lag 9 dekar brakklagt areal heilt nord i området.

Lærdal kommune fekk oppdatert kartlegging av viktige naturtypar i 2010. Dei næraste naturtype-lokalitetane er ei naturbeitemark av verdi B (regionalt viktig) som grensar mot eigedomen 7/13 i vest. Denne naturbeitemarka ligg 270 meter frå den omsøkte teigen. Vidare er det 210 meter unna på motsett side av Nivla registrert ein lokalitet med sørvende berg og rasmarker som på grunn av førekomst av sjeldne artar er gitt verdi A (regionalt til nasjonalt viktig), og 5-600 meter nord for teigen er det registrert ei naturbeitemark med verdi B og ein edellauvskog med verdi A.

Vurdering

Artsdatabanken har i *Fremmede arter i Norge, med norsk svarteliste 2012* klassifisert økologisk risiko for ei rekkje innførte artar. Fjelledelgran er vurdert til å vere av låg risiko, særleg fordi den har lita arealmessig utbreiing og fordi forynging vurderast å vere avgrensa på grunn av hjortebeiting. Fjelledelgran er oppgitt å normalt setje frø frå 30-40 års alder under våre tilhøve, men i andre kjelder er dette oppgitt til 20 år (DN-utredning 8-2012 *Kunnskapsstatus for spredning og effekter av fremmede bartrær på biologisk mangfold*).

Fylkesmannen har forutan artsdatabanken sine sider om framande artar vurdert eventuelle konflikhtar med prioriterte og utvalde naturtypar (Naturbasen), raudlista artar (Artskart), og våre egne data om sensitive førekomstar (rovfugl o.a.) som er skjerna for offentleg innsyn. Lærdal er mellom dei best kartlagde kommunane i fylket både med tanke på naturtypar og artar. At den omsøkte teigen tidlegare har vore brukt til juletreproduksjon betyr dessutan i seg sjølv at ein ikkje kan forvente førekomstar av spesiell interesse. Dei mange verdfulle naturtypelokalitetane i nærområdet er rett nok følsame for spreiding av framande bartre, men ettersom søknaden gjeld produksjon av tre som blir hausta lenge før reproduktiv alder er denne trusselen lite reell så

lenge området blir følgt opp etter føresetnadene. Vi meiner derfor at kunnskapskravet i naturmangfaldlova § 8 er godt nok oppfylt til å konkludere med at utplanting som skissert i søknaden ikkje vil føre til vesentlege uheldige verknader på det biologiske mangfaldet.

Rettleiinga til forskrift om utsetting av utanlandske treslag seier at ei vurdering av samla belastning på naturmangfaldet (naturmangfaldlova § 10) i tiltaksområdet skal inngå i behandlinga av søknaden. Ut frå det som står i søknaden om at alle dei utplanta trea blir hausta og ingen blir ståande igjen, meiner vi at tiltaket ikkje vil føre til auka samla belastning på økosystemet i området. Til grunn for dette ligg at alle tre haustast før dei når reproduktiv alder.

Vi minner likevel om naturmangfaldlova § 11 (kostnadar ved miljøforringing skal berast av tiltakshavar) og § 12 (miljøforsvarlege teknikkar og driftsmetodar), som betyr at tiltakshavar må ta kostnadane med å sikre at det ikkje blir spreidd frø frå feltet fordi det blir ståande igjen tre dersom drifta av ulike grunnar skulle bli lagt ned, og at driftsmetodar o.a. skal tilpassast slik at ein unngår eller avgrensar skade på naturmiljøet. Tilplanting på kulturmark er eit reversibelt tiltak, og når området ikkje har spesielle verdiar knytte til kulturlandskap og ein sikrar seg mot frøspreiing, vil det neppe få vesentlege uheldige følgjer for naturmiljøet.

Vedtak

Med heimel i forskrift om utsetting av utanlandske treslag til skogbruksføremål, jfr. naturmangfaldlova § 30, får Ivar Raa med dette løyve til å plante ut inntil 1 000 tre av fjelledelgran på gnr. 7, bnr. 2 i Lærdal kommune, i område avmerka med svart på kart/flyfoto som var vedlagt søknaden. Løyvet er gitt på desse vilkåra:

1. Løyvet gjeld for ei utsetting. Utplantinga må vere fullført innan 31.12.2017.
2. Alle trea skal fellast før dei blir frøproduserande. For å hindre spreieing, er det ikkje tillate å fjerne tre på rot frå feltet.
3. Etter at feltet er hausta, skal alle ikkje-omsettbare tre fjernast og feltet ryddast slik at det ikkje kan kome nye skot.
4. Den som har fått løyve, må etablere og dokumentere internkontroll etter § 10 i forskrift om utsetting av utanlandske treslag til skogbruksføremål.
5. Dersom eigeodomen blir overdradd til andre, må ny eigar informerast om løyvet og dei vilkåra som er sette for løyvet.
6. Dersom det blir oppdaga spreieing av tre utanfor plantefeltet, skal desse fjernast, og Fylkesmannen i Sogn og Fjordane må varslast.
7. Dersom drifta av ulike grunnar skulle ta slutt utan ordinær innhausting, skal grunneigar varsle Fylkesmannen. Dersom ikkje grunneigar ønskjer å rydde feltet sjølv, kan feltet ryddast for grunneigar si rekning.
8. Dette løyvet skal oppbevarast hos tiltakshavar og grunneigar inntil feltet er rydda.
9. Dette løyvet kan opphevast eller endrast i samsvar med § 67 i naturmangfaldlova, dersom det t.d. kjem fram nye opplysningar om dei omsøkte artane.

Klage

Dette vedtaket kan påklagast innan 3 veker etter at brevet er motteke, jf. Reglane i forvaltingslova. Klagen sendast til Fylkesmannen i Sogn og fjordane og blir avgjort av Miljødirektoratet dersom Fylkesmannen ikkje gjer om vedtaket.

Med helsing

Johannes Anonby
seniorrådgjevar

Tore Larsen
seniorrådgjevar

Brevet er godkjent elektronisk og har derfor ikkje underskrift.

Kopi pr. e-post til Lærdal kommune